

Unser Lehrerin

Unser Lehring, es Auguschde Pitz aus Sulzbach
war joo nitt vun weit häär.
Awwer mit der auszekumme war aarisch schwär.

Die erschde zwei Johr honn mir die gehadd;
Isch konn eisch sahn, das war e Kuinaad.
Die hadd Methode gehadd, heit konn ma driwwa lache,
awwer als Kinner kunnde ma nix degeejje mache.
Still honn mir gehall unn dehemm nix gesaad.
Mir honn Respeggd unn vor allem Ongschd gehadd.
Wenn se stroofe wold, war nitt nur die Hond schnell debei.
Aach e Rohrstegge unn de Fisselboje vun da Gei
hadd se als Erziehungsmittel benutzd,
zudemm uns mit schlimme Ausdrigg und laudem Schille
erunner gebutzd.

Allegaa ware mir, ob groß odda kläään,
fa die nur „die dumme Hahlgäns“ gewäään.
Is ma e Ontword schullisch geblieb,
hadd se uns die hinna die Ohre geschrieb
mit da flach Hond unn saad gonz knapp:
„Die do holld dir kenn Dokter meh ab!“

„Du Hornochs dohinne, paschd du ball uff,
sunschd grischde än uff dei Pannkuchemaul druff!“

„Du dummi Gons, zieh die Kuh om Schwonz.
Wenn isch schun nur so e Käässchmeer siehn,
kinnd isch grad die Geißegischdere grien.“

„Du doo, heerschd nitt, sischd nitt, bischd donn du schäääl?
Huggschd nur doo unn halschd Maulaffe fäääl.“

„Du dumm Haatzschmier,“ hadd se gekrääschd,
„du bischd nitt de Pascha vun Rom, dass de das wääschd.“

„Steifer Peder do driwwa, steh uff, bleib nitt hugge.
So bleed wie du konn nur e Ochs vum Blocksbersch gugge!“

Honn mir zu ihrem Gei-Spiel gesung
unn es hadd nitt graad so scheen geklung,
war de Ballawer riesegroß.
„Mach's Finschda zu, die Geiße reiße sisch los!“

Wenn se onn de Londkard hadd ebbes gezeid,
war de longe Zeijestock immer bereit.
Weil der awwer nitt so kräfdisch war,
hadd se denne emol kabudd geschlaa.
Nadierisch honn mir all gelachd.
Doch das hädde ma besser nitt gemachd.
Do honn mir se all dursch die Bank gefong.
„Das doo is mir iwwa die Huddschnur gong!
Lasse eisch begraawe, ohne Mussick allegaa.“
Das Sprischelsche oft ze heere war.

Es Dikdaadschreiwe honn mir besonnerschd gehassd.
Fa jeder Fähler hadd se uns e Nissje vapassd.
Oft sinn donn uffem Kobb Huwwelscher ennstonn.
Isch wääß noch gudd, wie das is gong:
Sie hadd de Middelfinger iwwa die onnere geleed,
unn so uff de Kobb gehämmerd, als ob se aanklobbe dääd.
Das Ään odda Onner hadd meh odda wenischer gelidd.
Demnoh wie se disch leide kunnt, haschd se äfder gridd.

Äämol war do e kurraschierd Fraa,
die hadd da Pitze Schlee ohngetraa.
Unn ach e Vadda is inner Stunn erschien,
vun dem hadd se aach ihr Schlee solle grien.
Das hadd dann letschdendlisch dozu gefiert,
denne ihr Kinner hadd se dodaal ignorierd.
Die hädde nimmeh in die Schul brauche ze gehn.
Fa die Pitze ware se Luft gewäään.
So ware prakdisch die erschde zwei Johr
vun da Schulzeid fa die Kinna valoor.



Johre späder honn mir Klassetreffe gehadd.
Nadierlich ware aach unser Lehrlinge gelaad.
Klar war die Frollein Pitz aach doo,
unn gonz wie frieher – e ald Fraa, wuusched unn schroo.
Nur de Hudd war nei,
das hadd se uns vazähld so näwebei:
„Denne honn isch erschd kaaf - beim Tille uff da Hitt.
Do honn isch villeischd e Schregge gridd.
Halt das mir doch e Spischel hin.
Was, honn isch gesaad, das soll isch sinn?
Seit isch mich frieher im Spischel betrachd,
hadd jo die Zeid vor mir aach nitt halt gemachd.
Awwer Eidelkääd war mir schun immer fremd,
isch honn misch noch immer ohne Spischel gekämmtd.
Ich strähle jede Dah mei Hoor
Unn das is midde Zeid e Gewohnhääd wor.“

Onn dem Owend hadd se e paar Weinscher geschluggd
unn uff äämal gonz wunnerlisch aus da Wäsch geguggd.
Donn mennd se, weil se die Kehr nimmeh grääd,
wer se so spääd noch hemm bringe dääd?
Was wollde ma mache, mir honn se gefiehrd
Unn se ze zwedd uff de Bischel bugsierd.

Es Auguschde Pitz is alt noch wor.
Wie alt? Kenn Ohnung!
Die war joo alt schun geboor!

